

23

10

A

MANIPULUS

in Armis

Philosophico expositus Cultui,

Sen

Triplex Armorum genus, indissolubili
Sanguinis, Virtutis, ac Honoris nexu, in
Unum Manipulum

COLLIGATUM,

Sub Fortunatissimis verò Auspicijs

PERILLVSTRIS ac MAGNIFICI DOMINI,

D. JOSEPHI
GRZYBOWSKI,

CAPITANEI SULEJOVIENSIS,

Discursibus Historico-Ethico Panegyricis
ILLUSTRATUM,

ac per triplicem mentis Operationem DISTINCTUM
à Philosopho Rationali, R. D. ADALBERTO JOSEPHO
TWORKOWICZ, Cler. Secular. in Commune vi-
ventium Alumno,

Præside R. P. NICOLAO JOANNE JELENSKI,
Societatis JESU, Ordinario Philosophiæ Rationalis Professore,
in Collegio Varsaviensi,

Anno 1706. Mense . die

In Stemma
Perillustris Capitanei.



- I. In Logica, cerno Lucem, caligine, quando
Singula FALX, veluti prævia Luna micat.
- II. Hæc tot cùm Genera intra se CRUX continet una
Arbor Porphyrij CRUX erit ipsa fibi.
- III. I Liber in totum mundum securus ab hoste,
Te stricto, tutum, cùm facit, ENSE, manus.

PERILLUSTRIS
MAGNIFICE DOMINE
CAPITANE E.

Phoosphorum Scientiarum Rationalem Philosophiam
cui ex æquo consecrem, nisi Tuorum auroræ An-
norum; hinc alti Sanguinis æquævo murice, in-
de tantâ jam virtutum maturitate purpurascenti,
ut ex hoc ætatis Tuae diluculo præsagâ mente eos
nobis auguremur dies, quos Maximi Tui vixere Aborigines, ex-
teris ad invidiam, Posteris ad exemplum, omnibus ad prodigium.
Nunquam equidem ex victimarum extis veriora excerpunt Aru-
spices vaticinia, quàm nos ex capite annorum eruimus secuturi pro-
gnostica ævi, in flore pubescentis vite, velut in folio Sybillæ, il-
lustria de venturis lustris legendo oracula. Ex Stellis seu fixis,
seu gradarijs Phenomenis erratica passim colligimus nomina; ex
avium volatu, nimis vaga & incerta venamur auguria; verùm
ex implumi mortalium ætate, majori de futuris fiduciâ divina-
mus. Ita olim Curialis ille augur Sylla Romanus ex malè præ-
cincto minorenni Julio, quantis cingenda esset undiq; angustijs Ro-
mana libertas, præscio conjecit animo; nec vanus utiq; præcinuit
Vates sub Julio dissipandam Rempublicam, qui laxiore cinctu col-
ligebat sinum, everrenda ab illo Quiritum decora, qui terram
verrebat discinctæ vestis appendice. Hinc è profundo pectore,
velut è Tripode fatidicis ductis suspirijs Septicollem monebat Rem-
publicam: à malè præcincto puero cave tibi Roma. Ve-
rùm non cadunt hæc infausæ divinationis semina in Manipulum
Tuum Perillustris Accrescens, quem benè præcinxit virtus, &
quæ jam sese rudibus pietas ostentat in annis, pridem feci
devin

devinctum Superis. Quid enim Tu ipse in herba etatis, nisi
colleſtaneus virtutum manipulus ab ipsis adorandus virtutibus, in
quem si quis coniecit oculum, rectè coniecit.

--- Nec vanæ fudit præſagia mentis,

Te fore quem virtus coleret; cui cedere vellet

Pallas, & attonitâ proles Cyllenia linguâ. (Barclai.)

Per annorum pleriq; gradus virtutis ascendunt apicem, nec prius
solidam mentem induunt, quàm prætextam exuant; Tu inter an-
norum rudimenta veteranus jam Tuorum Majorum Commilito;
hoc tantum ex teneritudine etatis habes, quod tenerrimè virtu-
tem & omnem honesti ſpeciem virili animo, ante virile ævum
adames.

O tener! & magnis ſi ſunt Natalia Divis,

Penè puer primisq; viro jam major in annis. (Barcl.)

At quidni in meſſem virtutum adoleſceret; quidni in morum al-
beſceret canitie hic maturus in immaturo ævo manipulus, quem
in aprico Avitæ gloriæ, & Sole circumclareſcentium Familiarum
collocârât prærogativa Natalium: quem ex omni Polonæ Nobilita-
tis flore collectum, magnis ſtirpibus alligârât vinculo; tam præ-
inclyti Sanguinis, ut non tenui avenâ hunc manipulo admodulari
domesticus noſter Horatius audiat.

Te decoro, Nobilitas comitata, grefſu

Centum vetuſtas neſcit origines,

Centumq; retrò per populos fluit

Ceris Avorum. (Sarbiev.)

Neq; enim in hoc baſilico manipulo agrariæ fluctuant ariſtæ,
verum ſtetere pergama, magnæ ſcilicet illæ concentratæ Domûs,
quæ Patriam velut adamantina pergama circumvallant. Non
impleo illis paginam, quæ totam penè impleverunt Poloniam, nec
ex campo Martis in publicæ lucis arenam transfero manipulum
illorum Heroum, qui in Martiali hoſtilium Caput Meſſe olim
deſudârunt, ut Tibi Sarmaticorum Agamemnonum Deciorumq;
Nepoti, heroicum pararent cibum; quo inefſatus eâ inardeſceres
gloriæ ſiti, quam vel operoſo ſudore inter togatas Patriæ curas,
vel hoſtico cruore exingueres in Bellonæ novalibus. Manipulum
olim

olim in Romanis castris labari vices subibat præibatq; belligerantibus Quiritibus, Tibi Heroicus Quiritum, id est Progenitorum Tuorum præcurrit Manipulus, in quorum singulis etiamnum miratur Bellona Virum, ac unicuiq; illud Leonidis Epitaphium inscribit Sarmatia: Speculum bene meritorum de Patria. Quid Speculum, nisi Crystallinus quidam specierum, colorumque manipulus, multiformes in se objectorum colligens vultus? Quid Tui Majores? nisi Gradivo Speculum, in quo Fabiorum, Catonum, Numantinorum, Coclitumq; heroicas species, & ferri memores genas contempleris. Verum Tuae consultura memoria natura, ut minore operæ pretio Tuos Majores disceres, in uno concentravit Magno Genitore illa viva Heroum Iliade, qui

--- --- Dignus erat, cui cederet uni

Sylla acie, genio Fabius, pietate Metellus,

Appius eloquio, vi Tullius, arte Camillus. (Sidon.)

Jam quidem ille emeritum vitæ manipulum, non tam annorum, quam rectè gestorum copiâ uberrimum, submitit falcata vi mortalitatis, inq; alio posuit sua sidera Cælo. Verum, non totus supplantantis fati vindemia in prædam cessit; sed pars melior sui vitavit Libitinam, & ne quidem summis, delibata Parcarum labris in Te, vivit.

O Magnanimi Proles animusq; Parentis! (Barclajus.)

Non enim es de Classe illorum Stolonum, qui contenti patrimonio Nominis tantum succedunt in bona; non in optimas Progenitorum virtutes, quorumq; exsors Patriæ virtutis indoles Paternam Sortem accipit, tametsi nil Patrium nisi Nomen habet.

Tu verò, PERILLUSTRIS ac MAGNIFICE DOMINE, non tam plenus imagine Patris occurris Patriæ, non tam vultus lineamentis, quam ad sublimia collineante animo, Tuum exprimis Progenitorem, expressusq; fato Paterno nobis lachrymas reprimis. Supervacaneum enim censemus eum luctuosâ prosequi pupillâ, quem in Filio redivivum hilarescentibus Patria oculis in-tuetur. Hinc magis quam in Euripi anfractibus hæret anceps Archipater Philosophorum, dubius, utrum Patri an Filio hunc in-scribat Manipulum, cum unum ab alio subtilissimus aliàs specu-lantium

lantium Princeps distinguere non possit, Ascanium à Magno Ænea, Marcellum ab Octaviano, à Philippo Alexandrum discernere nequeat. Nilominus soli Filio Paternarum virtutum Compendio, pretiosaq; Manipulo primum Philosophica Messis Manipulum consecramus, & eruditae solvimus decimas Sacro Oeconomo intra Regisicum Tuum Nomen hospitanti. Ingratum fortassis, nec Rationale munus est, Sarmatico flori rationales spinas, accrescenti luci, & in perfectum jam grandescenti diem, obscuram Logices caliginem dedicare. Lechica gemma Clavum Scientiarum GRZYBOWSCIANÆ DOMUS inclytæ Plantulæ ramosam Porphyrj Arborem, Cithara, in solatium Orphana nuper Domus, relicta, Organum Aristotelis devovere. Verum ipsius Agnominis instinctu ad Manipulum Praeinclyti Accrescentis pertinere videtur Aristoteles, cui enim nisi Manipulo huius Aristæ loco inseri dequerit, ut securior à Censorijs sit Aristarchus. Admittere ergo Avis decorus, & Avorum decus Perillustreis Accrescens, ad umbram Manipuli Tui aspirantem, Porphyrj arborem, rationalem Scientiam in rationabile obsequium sese Tibi sacrificantem; dignabere eo accessu, quem brevi post Philosophicas nostras cathedras, exambient prima in Senatu Subsellia magna in Sago & Toga dignitates. Arcano enim Divum consilio, Aurora Scientiarum ad Te descendit, ut prodrômo antecessu non unum honoris Solem Tibi exoriturum præcedat, & natura ordine præludat Phosphorus diei imminentium dignitatum. Præcalcat ad Te Peripathetico passu Aristoteles viam, Peripatheticis, id est, continuâ olim deambulatione in Tua atria demigraturis honoribus. Neq; advena honor Logicas horrescit spinas, Tuis undequaq; plantis adherentes, imò sublimi conjecturâ divinabit, nihil molle esse in molli tametsi ætate Tua, quæ spinas eâ impune & animosè tractat manu, quâ alij in hoc ævi præludio vanas tanquam Socratici Equites tractant arundines. Non erubescant Tibi vel maxima famulari dignitates, cui Magni Magister Aristoteles in tributarium sese devovit clientem. Verum antequam Sol & Luna majora honorum luminaria suum adorent Iosephum, præoccupat lucem Logica caligo, & coram magna spei Accrescente, decrescit altissimâ capitum inclinatione, Tuam munificam umbram exambientium. Non ita tamen crassa est Logica caligo, Tuarum licet gratiarum aucta pretiosa umbrâ, ut in ea non appaream

MAGNO NOMINI TUO

Devotissimus

ADALBERTUS JOSEPHUS TWORKOWICZ,
Cleric. Secular. in Commune viventiu Alumnus.

DISCVRSVS PRIMVS DE FALCIBUS.



Nihil est in rebus humanis præstantius, quàm Antiquitas, quæ semper in pretio habetur. Lex Laconica erat, quæ jubebat omnes, sive genere & Nobilitate, sive dignitate aut ætate antiquissimis, primatum cedere; *Non quia alijs semper meliores sunt senes, sed quoniam virtus inveterata recentiori est anteposenda.* (Farne Eub. lib. 3. de Simul. Reip.) Aristoteli verò *honorabilissimum est quod antiquissimum,* (i. Metaph. c. 3.) & ipsius naturæ consuetudine quâdam, an proensione illud malumus, cujus usus antiquior. (Symach. lib. 10. ep. 14.) Porro gentilitia arma sunt quædam vestigia generis & virtutis, per quæ ad primam Heroum seera posteritas venire solet originem. Itaq; falcata Nobilitatis primordia si quæras, tempus Falce armatum inspicere, quo nihil est antiquius in orbe. Cæterum primam Falcibus originem dederunt antiquissimi hominum populi, Telchines dicti, primi inventores ferri cudendi, utpotè qui Harpen, id est ensẽ falcatum Saturno fecerunt, à quibus Rhodus insula olim Telchinis dicta. (Strab. l. 15. Geograp.) Ut verò Saturnus Deorum est antiquissimus, quia sæculorum Pater, & temporum Dominus dictus, ita cœva sibi insignia Falces: ac idcirco in Simulachris Antiquorum Saturnus pingebatur barbatus, cum Falce in dextra, nunc capite velato, nunc detecto, quia tempore aliqua latent, aliqua patent; in sinistra serpentem in orbem convolutum præferebat, ad indicandam rerum volubilitatem, quæ temporum vicissitudine assiduò volvuntur, revolvuntur, involvuntur, donec omnes velut sub falcem cadant, nempe ad arbitrium Cœli, Polique, cujus Filium primitivum esse Saturnum credidit Vetustas. Hæc causa fuit, ut Saturniæ falcis tum

ci tum à cæteris Gentibus, tum potissimum à Siculis ingens haberetur cultus. Quippe in Sicilia olim inventa Saturni falx, velut quoddam felicitatis pignus non in profano ærario, sed in sacris Fortunæ ædibus & aris servabatur, tamq; diu aurea Saturni sæcula superstitiosa Gens sibi vaticinabatur, quamdiu ejus falcis inviolatus vigeret honor. Falx enim pacis, quàm feliciorem sæculorum nutricem appellabant Veteres, Symbolum est. Hinc falci velut pro Lemmate inscripsit Martialis:

Pax me certa Divis, placidos curvavit in usus,

Agricolæ nunc sum, Militis antè fui. (lib. 4.)

Creticis nefas erat aciem falcis excitantibus, cotem aquâ perfundere, sed oleo, fortassis quod aqua continuo motu & procellis tempestatem bellorum denotet, oleum suâ pinguedine ubertatem pacis, cui optimè cum falce convenit. Siquidem

Pax Cererem nutrit, pacis Alumna Ceres,

Messem quæ dum falce metit, pacem quoq; nutrit & ipsa. Sed ut pacis Symbolum, ita belli & Martis præsidium sunt, dum *rigidum falces curvantur in ensen.* (Virg. 1. Georg.) Hinc falcati currus, falcata acies, falcati enses, præcipuum in antiqua militia robur & tutamen, in qua militis *semper adunca, dextera, falce quàm jaculo gravis est.* (Ovid. 14. Metamorph.) Olim verò falx dabatur custodibus hortorum contra fures & prædones, teste Scripturâ (Zach. 4.) Ita non solâ antiquitate, sed honore & usu falces cæteris præstant armis; suoq; splendore coruscæ, *non aliena metunt*, ut quidam inscripsit falcibus. Quibus & illud Appellis Symbolici optimè quadrat, qui falci flores metenti, parcenti radicibus, adjecit: *Alta petit, cum negligit ima.* Quod si quibus, certè Gentilitijs Magnorum Heroum, id commune Falcibus,

APO.

APODOSIS ETHICA.

Quantum Antiquitas ad Nobilitatem generis confert.

Difficile sanè ferre iudicium, plus ne ex opinione, an
veritate familia Nobilissima æstimetur, quæ antiquis-
sima, præsertim cum primâ specie iniquum censea-
tur esse, eò Nobiliorem judicari eum & haberi, quò quis
antiquiorem repetat originem; quasi verò iste quàm ma-
ximo intervallo distet à suo principio, undè primùm pro-
diit, & effulsit claritas familiæ. Cum è contra Philosophis
excellentiùs est, quod suo principio conjunctius, quàm
quod ab eodem vel ad latum discesserit unguem. *In tan-
tum unumquodq; perfectum est, in quantum ad suum principium
attingit.* (D. Thom. 1. part. quæst. 12. in ☉) Quod
planè commune illis axioma est. Hinc Sol in ortu gra-
tior, flos in vere nobilior, magisq; blanditur oculis mo-
dò nata Floræ in viridi fasciâ soboles, quàm provecta ad
maturitatem Cereris canities. Arbor in radice fœcundi-
or, à qua quò longiùs procedit, eò fertilior vermium.
Fluvius quò propior suo fonti, magis illimis est; at quantò
plus à sua recesserit origine, tantò plus de limo trahit,
utpote in quem conjurati alvei, velut claræ suæ invidi
origini, undiq; congestas montium exonerant quisquilias.
Attamen si hæc peritiori discutiantur trutinâ, non Novi-
tati, sed Antiquitati favent Generis. Nam & Sol quò al-
tiùs progreditur, eò spectabilior apparet Orbi, & qui in
ortu suo, spem non nisi futuræ serenitatis pollicebatur,
ubi attigit meridiem, non quovis, nisi Aquilarum oculo
excipiendam spargit lucem. Nec ab Arbore decerpta ra-
tio hac in parte maturam sapit veritatem, cui experientia
inficias ibit. Nunquam enim in Hesperidum hortos re-
floreferet planta, nisi suis erepta cunabulis longiùs dista-
ret.

ret. Imò propinquæ radicibus Arbores nisi se altiùs pro-
vexerint, nil fructuum, præter sterilia ventis in ludibri-
um gignunt folia. Verno autem flori quantò plus deco-
ris aut pulchritudinis tribuitur, tantò de diuturnitate demit-
tur, quod Magnis Familijs semper injurium est. Et unum
maturæ Cereris culmum pluris Colona Respublica facit,
quàm mille in primo flore spicas, quas solâ spe fructu-
um, non fructibus fœcundat tellus. Nec flumina suum
fortirentur nomen, nisi remotiùs à suo decidua fonte, in
eam diffuerent vastitatem, quæ fluvij non tenuis rivuli
mensuram mereatur. Nunquam certè tot dissidia & con-
tentiones extitissent inter Ægyptios & Phœnices, Phryges
& Arcades, de prima gentis origine, dum aliæ ante alias
in lucem se editas gentes jactabant, nisi plurimùm anti-
quitate splendoris oriretur. Tot Veterum monumenta re-
volve; cernes novas & novas ad placitum Imagines ex-
poni, in quibus vetustatem sui generis oculis & admira-
tioni depingere satagebant. Nam apud Ægyptios alæ Vul-
tuum domorum foribus præfixæ, indicium Nobilitatis &
vetustæ Familiæ dabant, ex eo, quòd Vultures præ cæteris
avibus vivant diutissimè. (*Alex. ab Alex. lib. 2. c. 24.*) Ar-
cades, ut se ante Lunam genitos profiterentur, Lunulas
in calceorum fibulis pro insigni suæ Nobilitatis gestabant,
undè & Profelini, id est ante Lunam nati, vocari voluê-
re. Quod & Romana Nobilitas sibi arrogavit. (*Plutarch.
in Problem.*) Athenienses vestibus & crinibus auream in-
nodabant cicadam, hoc veluti Stemmata Nobiles se indi-
genasq; ostensuri, quia nimirum iisdem testibus ut cicadæ
in una eademq; regione enascantur, crescant, vivant, mo-
riantur, ita eos censebant Nobiles, qui antiquâ oriundi
Familiâ, Aborigines suos in eadem Urbe longâ recensent
serie. Quod Alciathus metro complexus:

*Aurea Cecropijs nectebat fibula vestes,
Cui conjuncta tenax dente cicada fuit.
Calceus Arcadico suberat, cui Lunula ritu,
Gestatur Patribus Mullea Romulidæ.*

Indi-

*Indigenas quòd se assererent, hæc Signa tulerunt
Antiquâ illustres Nobilitate Viros.*

Romanos tamen non tam Lunulas, quàm Semicirculum, quasi literam C, in calceis gestasse prodit Zonaras, quod ex Numæ instituto Senatoribus, eorumq; posteris concessum est; nimirum ut hoc Signo centenarium numerum, qui litera C designatur, quo tunc Senatores continebantur, definirent, adeoq; ex antiquissima Patritiorum Familia dignoscerentur. Unde in proverbium abiit, *Nobilitas in astragulis*. Idem ut se ab antiqua Trojanorum gente originem ducere monstrarent, pro Nobilitatis Signo Palladium usurpabant. (*Massen. in Spec. Imag. lib. 2. c. 4.*) Franci longam Proavorum seriem exhibaturi cæteris, longam alebant cæfariem, quod ingenuæ Nobilitatis index erat. (*idem ibid.*) Quorsum hæc esset jactantia de vetustate Originis, nisi ad Familiæ Nobilitatem pertineret, maximè esse antiquissimâ. Fateor equidem, *peperisse Nobilitatem melius est, quàm acceptam corrupisse*. (Salust. de Bello Jugurt.) Hinc etiam Roma tanta licet Nobilitatis zelatrix, Marium, tametsi genere ignobilem, Numidiæ præfecit. Nec illud inficiari audeo, quòd non faciat Nobilem, *atrium plenum fumosis imaginibus*, (Seneca) *nec census, nec clarum nomen Avorum, sed probitas Magnos, ingeniumq; facit*. (Ovid.) Cum

*Nemo Virtutem Proavus, Paterq;
Vixit in nostram, sibi quisq; Famam
Debeat nec se, Vetulis Avorum*

Augeat Umbris. (Ines.)

Et hic præcipuus Stoicorum conatus erat, adèd pro virtute depugnare, ut hæc unâ omnes allici debere, neminem generis splendore extolli, aut gloriari decorum censerent. Quibus utpotè Stoicus suffragatur Seneca: *Qui imaginem in atrio exponunt, & Nomina Familiæ suæ longo ordine multisque Stemmatum illigata flexuris in prima parte ædium collocant, Notii magis, quàm Nobiles sunt*. Verùm hi quantum pro virtute decertant, tantum virtuti injurij sunt, eodemq; impetu,

quo gentilitiam Nobilitatem impugnant, Virtutem ipsam
ē medio tollere conantur. Cum Virtus Nobilitatis quæ-
dam genitrix est. Ex illa, ceu ab augusto quodam fonte,
omnis Nobilitas generis dimanat, qui in Politicis honor
quispiam est, qui utiq; Virtutis est præmium, quo illa frau-
dabitur, si hæc Nobilitas de medio tolletur. Demum ipsa
Nobilitas Virtus generis est, (Arist. lib. 3. Polit. c. 8.) & per
omnia cum Virtute Nobilitati convenit. Ut enim Virtus
ad Nobilitatem, ita Nobilitas ad Virtutem stimulus qui-
dam est. Et ut Virtus utcunq; testā diū latere, quin hu-
manos perstringat oculos, nequit, ita Nobilitas. Imò hæc
naturā ipsā ferè indice vel in ipso vultu, aut totius cor-
poris aspectu, ad Virtutem natam facilè prodit indolem,
animumque. Eas enim insculpit notas & characteres, ut
hominem altius spirare, & Magnificum quid (quod &
Virtuti commune) sapere facilè deprehendamus. Hinc
Paris ad Helenam:

Forma vigorq; animi, quamvis de plebe videbar,

Indicium testæ Nobilitatis erat.

Nec alio argumento Dido Æneam Nobilibus Avis, imò
Dijs esse genitum sibi persuasit.

Quis novus hic nostris successit sedibus hospes?

Quem sese ore ferens quàm forti pectore & armis?

Credo quidē, nec vanā fide, genus esse Deorum. (Æneid. 4)

Ita certè -- Nobilitas cunctis exordia pandit

*Laudibus, atq; omnes redeunt in semina vires. (Claud. in
laud. Seren.)*

*Verisimile est, ex bonis bonos esse. (Arist. 1. Rhet. 9.) Ideò ple-
riq; boni provenerunt, quia ex bonis traxerunt Originem. (Plato
in Menet.) Nec parū ad Virtutem facit, non Fortunā, sed co-
gnatā quādam præparatione bonum fieri, qui enim obscuro loco
nati sunt, possunt quidem hoc sibi adsciscere, ut viri boni sint;
attamen eorundem ignobilitatem etiam innata quādam vitia ali-
quando arguere possunt; quibus verò semina virtutis à Majori-
bus per multum tempus ducta adfunt, fieri non potest, quin &
inge-*

ingenua, & perpetua virtute sint præditi. (Anton. in Orat. Funeb. de Cæs. interfect. apud Dionys. Cass. lib. 44. Hist. Rom.) Reverà nullæ gentes, nullæ leges sunt, quæ non multum Nobilitati immunitatis, dignitatis, & authoritatis tribuant. Apud Romanos Equestris Ordo Seminarium Senatorum dicebatur, & Marius ad plebem Romanam agebat: *Nobilitas omnes honores non tantum ex merito, sed quasi debitos à vobis repetit.* (Salust. in Jugurt.) Et quidem Romani non cujuslibet Nobilitatis, sed ab antiquitate illustrioris potissimam habuere rationem, apud quos non patebat ad Senatoriam dignitatem aditus, nisi illis, qui ad minimū trinam Majorum seriem retexuerint, quod & lege cautum erat, quam cum Appius Claudius censor infregisset, filiosque quorundam Libertinorum in Senatum adlegisset, rei indignitate L. Plancius adeò motus est, ut se Magistratu abdicare maluerit. (Liv. lib. 9.) Cum idem Claudius Imperator exemplo Appij contra jusjurandum, quo se adstrinxit, neminem, nisi Romani Civis Abnepotem ad Senatum promovendum, fecisset; non minorem invidiam Senatûs, totiusq; Romanæ Reipublicæ incurrit; eosq; Senatores summa cum ignominia & dedecore, admissos licet ab alijs Imperatoribus, à Senatu amovit Nero. (Justin. lib. 1.) Ex his liquidò patet, quantum ad Familiæ splendorem conferat generis Antiquitas.

APODOSIS PANEGYRICA.

Antiquitatis Patrem colant Saturnum cæteri, in Avita GRZYBOWSCIORUM Domo plures quàm Unum Saturnum, plura quàm unum aureum Sæculum coluit, colitq; Lechia. Si ad primam Illustrissimæ gentis Originem revocavero pennam, integra Sæcula retexere deberem. Sive enim Crucis, sive Falcium revolvantur insignia, Utrorumq; monumenta non nisi Sæculorum, imò vix Sæculorum lustris definiri possunt. Ut ergo Solis Lunæq; initia, aut Septemplicis ostia Nili remetiri temerarium,

rium, ita vetustissimos Primorum Aboriginum fastos, quos ipsa tantæ Domûs Gloria, ab oblivione Sæculorum vindicavit, in memoriam reducere superfluum duco. Parco itaq; Sacris Manibus, qui è Principum splendoribus oriundi, etiamnum in Illustrissimo Domûs Olympo per succedaneam Posterorum lucem, gloriæ tenent meridiem. Illud solùm non sine omine factum memoro, quòd Gentilitias Ceras Vicinior posthumis Sæculis GRZYBOWSCIANI Generis Author, non alijs conglutinari, quàm Principum Ducumq; Masoviæ sit passus Ceris, Unus & ipse è Triade Prussorum Fratrum Principum Princeps. Nempè jam tum documento Posteris erat, quantam gloriæ messem Secuturis relinqueret Nepotibus, ad quam è Martis campo strenuum sub CASIMIRO agens Ducem contra Maslaum, Masoviæ Principem, Heroo sudore & Sanguine irrorato, colligendam, binas adsciverit falces, cum una non sufficeret. Ita jam tum tantâ meritorum fulsit serenitate, ut perpetuam succedaneis ætatibus daturus æstatem, omnia statim augusta, omnia matura falci relinqueret. Imò Suis jam ipse quâ bello quâ pace partis, non suffecturus metendis palmis, posteris reliquit Falces, quibus illas in Coronam sui meterent Nominis. Marti certè extortas crediderim Falces has, cui per limites Patriæ falcato curru non sine Civium grassanti cæde, invictus ille eripuit Heros, ut innocentius vehi doceret. Prima hæc cum adscititijs Falcibus Crucis Suxæ fœdera, in tot demum Principum Familiarum decora, velut in suam messem misère Falcem, quotquot GRZYBOWSCIANIS Ceris, unâ cum suis splendoribus adhæserunt Ceræ. Nimirum LIPSCIORUM, OSSOLINSIORUM, KAZANOVIORUM, GULDENSZTERNORUM, KUKLENSCIORUM, KRASINSCIORUM, OLECCIORUM, CZARTORYSCIORUM, SAPIEHARUM, CIECISZEWSCIORUM, GORSCIORUM, WOYNARUM, RADIWILIORUM, DOROSTAYSCIORUM, TYSZKIEWICIORUM,

CIORUM, DANIŁOWICIORUM, WOŁŁOWICIO-
RUM, KURCZORUM, SWERINORUM, POTOCCIO-
RUM, NARZYMSCIORUM, NIEDZIAŁKOWSCIO-
RUM, LASSOCCIORUM, ZABICCIORUM, PRAZMO-
WSCIORUM, OBORSCIORUM, SWIDZINSCIORUM,
KOZYRSCIORUM, OKECCIORUM, KIERDEJORUM,
KOMOROWSCIORUM, TEGOBORSCIORUM, KAR-
SCIORUM, ZIELENSCIORUM, KRYSCIORUM, PA-
RISSORUM, & Sexcentorum aliorum, quos non nisi Stel-
larum Planetarumq; numero complecti liceret, qui in u-
no GRZYBOWSCIANI Nominis Zodiaco continentur:
per quem Avita Domus Solis instar hætenus non sine
gloriæ splendore decurrit, decurretq; tamdiu, donec per-
fistis numerantur Avi, semperq; renata Nobilitate virent, &
Prolem fata sequuntur. Sequentur autem semper, utpote
contra quorum invidiam Falcem, geminæ sub victorioso
Crucis Labaro, militant Falces. Quod si & tempus suam
opponat falcem, armata gladio retundet manus. Quan-
quam veriùs credo, tam Libitinæ, quàm temporis falcem
Vobis conceditam esse, ut non illorum arbitrio, sed Ve-
strâ Virtute ad nutum arceatis fata. Jove se aut Marte,
aut Sole natos fabulosè jactabant multi, in quorum gestis
nihil, præter meras fabulas reperit Antiquitas; Vos citra
ullum commentum *documenta datis, quâ sitis origine nati.* Il-
lâ nempe, quæ vel ipsi Saturno, Deorum licèt Parenti,
temporis præriperet palmam. Non ænigma narro, cum
aut Avitas Falces Vestras inter Sidera relatas, aut Sidera
in Vestris reluxisse censeo. Scilicet & in astris est suis
falcibus locus, quas inter Stellas numerant Astronomi:
Quasi Cælo terrisq; militaturæ, utrumque cardinem jure
quodam sibi vendicarent. Enim verò, si Astronomicum
Archimedes tubum in Vestras fixisset Falces, tot lucidiora
certè advertisset astra, quæ suis, non mutuatis à Sole ful-
gent splendoribus, quot Herodès, imò Heroum Soles, non
sine admiratione ad calculum revocasset. Eum quippe.

Virtutis, an Fortunæ ordinem Domi Vestræ fecere Superi, ut omnes pænè ante ortum Illustrissimi, aut Soles appareatis, aut Sidera, digna, quibus ad publicæ lucis serenitatem primus semper in Cœlo Patriæ concedatur locus. Nimirum Virtus Vestra naturæ prævertit ordinem, quæ nil magnum repente dedit. In Auroræ fascijs pusillus apparet Sol, antequam ad eam excrescat magnitudinem, quâ totum occupet Orbem. Tenuibus rivulis veluti infantilibus lachrymis infantix suæ illachrymantur flumina, antequam ingentibus sustentandis navibus, pares acquirant vires. Inter humiles Myricas serpit Cedrus, antequam nubibus inferat caput. Adultæ messi præludit gramen, vile folium rosas, nihilq; se totum repente prodit. GRZYBOWSCIANO Nomini velut è Cœlo deductâ origine, totus se simul Illustrissimæ Domûs infudit splendor, ut quod de suis natalibus superbè jactabat Commodus, se non visum à Sole, nisi in purpura, id citra absentationem de Vobis dici posse, in ipsis Lucinæ cunis, Vos, aut purpuratos, aut purpurâ dignos videri & esse. Laudo quidem illorum genium, qui suæ plus Virtuti, quàm Majorum debent Fortunæ, illo pro tessera usi: *Nostra nos clarat virtus, & suo quondam generosa plausu acta.* Nec illud negare aulim, è tenui casa conspicuos Orbi prodijisse Piaſtos & Catones, à ligonibus Marios, & plerosque, quorum

Nemo Lucinæ meritū onustus

Debuit annos. (Ines.)

Cæterum ut fatales Cometas, ita hæc repentina Phœnomena non sine terrore sæpè præter, aut contra naturæ cursum subito erupisse indoluit Orbis, sub Tamerlane, Attila, cæterisque. Illud tamen Orbis totius experimento compertum comprobatumq; est: *Fortes creari fortibus & bonis, nec imbellem feroces progenierant aquilæ columbam.* Et quod fortuita sors in alijs, in his naturæ ordo quidam facit, ut Sol non umbras, sed vel diem, vel sui vicaria generet astra. Atq; hæc est Domûs GRZYBOWSCIANÆ series,

series, ut forti succedat fortior, bono melior, Illustrissi-
mo Illustrissimus, quasi unus omnium in se congefisset
decora, quæ divisa beatos efficiunt alios. Tales Tui fuê-
re Majores, PERILLUSTRIS CAPITANEE SULEJOVI-
ENSIS, ut si illorum imaginem pingere vellem, pro colo-
ribus lucem, pro penicillo radios, pro prototypo Solem
proponerem. At ne sic satis Nobilitatis Tuæ adumbræ-
rem Ideam. Nam & Soles ipsi interdum patiuntur ecclyp-
sim, vel extincta luce dum nostrum linquunt Cœlum, nil
nisi tenebrosam noctem, aut exiguæ duntaxat lucis astra
pro excubijs Cœli relinquunt. ILLUSTRISSIMÆ DO-
MUS TUÆ Herodēs nunquam toti nobis occidunt, quin
post fata etiam parito Sanguinis splendore præluceant Pa-
triæ, foveant Cives, illustrent Senatum, accendant Ceras,
serenent Universos, semperq; pro Castore succedat Pollux.
Desiêre inter mortales, aut veriùs disparuere, ut inter Nu-
mina apparerent, *Illustrissimi* JOANNES GRZYBOWSKI,
Castellanus Lublinensis, Tritavus Tuus; Proavus *Capitaneus*
Varsaviensis; *Dapifer Nurensis* Avus Tuus; *Capitaneus Sule-*
joviensis. Genitor, (ut reliquorum Sacris parcam Cineribus,
quos in Sacrario æternitatis posthuma recondit gloria).
At horum damna non sine scœnore gloriæ resarciunt su-
perstites Posterī, *Illustrissimi* inquam *Castellanus Inovladislavi-*
ensis, *Vexillifer Czynscensis*, Avi Tui, STEPHANUS, *Pocil-*
lator Nurensis, in quo utpote germano Fratre *Genitoris Tui*,
imò totius Domus dotes velut in compendium collegit
Virtus, ut quidquid in illis sive Gradivus in campo, sive
in Sacrario libertatis Confusus, sive in publicis functionibus
desideraret Mercurius, in hoc uno habeant quod suspici-
ant; CONSTANTINUS, re & nomine Victoriosus, indi-
viduus Poloni Martis comes; ANTONIUS, *Dapifer Czyn-*
scensis; JOSEPHUS, *Castellanus Inovladislaviensis*. Ita quod
Mari commune, idem Illustrissimo Sanguinis Vestri Oce-
ano, utcunq; per innumeros sese dividat fluvios, quasi nil
sibi decessisset, minimè à sua decrescit magnitudine. Nem-
pe etiam

pe etiam tum, dum unâ à se recedit mare per tot minorum fluminum sparsum alveos, alterâ se reparat parte per tot foederatorum amnium conjunctionem, qui in id unum quasi conspirant, ne suo Nereo definat magnitudo, à quo primam hausserunt originem. Et in Vestræ Domûs Erythren, plenis undiq; Illustrissimus Sanguis influit alveis, tot foederatarum, per Consanguinitatis nexum Familiarum, quarum innui tantum decora, cum omnia recensere non valeam. Alibi fallunt Pythagoræ dogmata & fabulosæ Metempsychoses; ast in Avitis Domibus perpetua hæc est animorum transmigratio, ut non imagines tantum Majorum in Ceras, sed & animi in Posterorum quodammodo immigrarent indolem, in qua velut in speculo etiam post fata relucent. Quod ne quis in dubium vocet *Tuam Indolem* PERILLUSTRIS MECÆNAS, censorio inspicat oculo, & nisi publicæ de Te spei injurius esse velit, non invitus, nec sine lætitiæ sensu ad magna Natæ Indoli accinet cum Vate:

Felix illa dies, totumq; canenda per Orbem,

Quæ Tibi vitales cum primum traderet auras,

Contulit innumeras, intra tua pectora, dotes. (Lucan.)

Sudabunt olim in Tuis Laudibus Oratores, laborabunt penæ, sciscitabitur curiosa Posteritas:

--- -- -- Quæ Te tam læta tulerunt

Sæcula, qui tanti talem genuere Parentes? (Æneid. 1.)

A teneris unguiculis jam in Te proditur PARISSORUM Leo, quantam spiret magnanimitatem, quam cum Materno suxisti lacte, imò cum Sanguine accepisti. *Nôrunt certè cui serviant Leones.* (Martial.) Novit PARISSORUM Domus, quem sinu foveat Leonem, illum nimirum, qui melius pro publica felicitate, quam pro aureo Vellere insomnis excubat Draco. Leo hic Cœlesti splendore notatus, vel ipsis Superùm expugnandis par affectibus, pridem intra Solis admissus conclave, ad quantos Cœlitum admissus honores, palam est, qui ita suum illi partiti sunt jubar,

jubar, ut si hunc tollas è Zodiaco, Solem è Cœlo sustu-
listi. Nimirum suæ Majestatis securitatem Cœlestis ille
Planetarum Rex nulli tutius concedere potuit, quàm Le-
oni; ut jam quò propior sit huic, eò sublimiùs emineat,
ubi deserit Leonem, sensim & ipse sua minuatur sereni-
tate, breviusque dominetur Orbi. *Materni Leonis Tui*,
BERILLUSTRIS CAPITANEE, genuinus Genius est, qui
ad publicam natus lucem non alibi, quàm inter honorum
splendores suum fixit Zodiacum. Hinc, quotquot PARIS-
SORUM Nomina, veriùs Togæ Sagiq; Numina numeravit
Lechia, tot sui Cœli Soles in Leonis Signo stetisse credi-
dit, qui Patriam meritis, pietate Religionem, fortitudine
Martem, suammet Domum Gentilitijs Decoribus illustra-
runt. Quis enim sine grata memoria illos recenseat, quo-
rum Avitus Leo non aliam prædam, quàm animorum &
affectuum agere consuevit. Quid igitur mirum, quòd ipsæ
Dignitates pæne festinatis passibus, ultrò ad eos, tanquam
ad immortale Sacrarium properarent, tanquam de Nobili
certarent palma, si quæ illarum prior tantorum Heroum
occuparet manus. Vix ullæ Masoviæ Curules, vix ulli,
imò nulli fasces, nulla honorum insignia sunt, quæ sub
hoc Leone securam sui non haberent custodiam. Sed par-
co illorum laudibus, quibus pro encomio illud unicum
plus quàm satis est, quòd de HIERONYMO PARISS,
Palatino Masoviæ, ad Posterorum memoriam relictum, se-
ra leget Posteritas: *Tu, Majoresq; Tui, omni in memoria Se-
natores laudatissimi, Catholici semper fuerunt, & Tu demum ijs
præes, qui Avitæ Catholicæ Religionis Assertores maximi sunt, &
toto Regno illam unam Provinciam Masoviæ hoc errore Sæculi ab
heresi immunem conservârunt.* (Christoph. Warszawicius in
Orig. Polon. apud Okolsk. Tom. 2.) Quæ sola laus omni-
um laudum apex est. Felix tanto præsidio Masovia! Fe-
lix fuisset & Lechia, si hunc Orthodoxæ veritatis Asserto-
rem Leonem (unde & Nomen Patrium PRAWDZIC ad-
hæsisse credo) ubiq; haberet pro excubijs, nunquam pro-
fectò

fectò tot Hæresum numeraret monstra Patria, quæ candi-
dæ Aquilæ suæ tot atras inspersere maculas, vix sanguine
elundas. Stetissent certè immoti pro fide VENCESLA-
US *Castellanus Varsaviensis*, JOANNES *Tribunus Varsaviensis*,
ADAMUS *Capitaneus Czynscensis*, idemq; postea *Varsaviensis*
Castellanus, SIGISMUNDUS itidem *Castellanus Czynscensis*,
ADAMUS *Canonicus Cracoviensis*, & ipso Nomine FELIX
(ut cæteros taceam) *Castellanus Lublinensis*, Genitor Peril-
lustris Genitricis Tuæ, Tuusque Avus, PERILLUSTRIS
CAPITANEE. Stetissent inquam immoti, si in suppetias
cum suo Leone Orthodoxæ vocarentur Religioni. Sed
temporum succensendum ignaviæ, quòd ut pro Masovia,
ita pro toto non steterint Regno contra Hærescon hydras,
non verò illis, quibus non animus defuit, aut robur, sed
sola occasio, suum in certamen committendi Leonem, qui
ut ore mordicùs tuetur in Patrio idiomate veritatem, ita
ab erroribus facilè eandem vindicasset; de quo id unum
dixisse sufficit, parem hunc esse Orbi Leonem, utpote quem
unguibus gestat, itaq; hic ipse circulus in æternitatis Co-
ronam PARISSIANO cedit Nomini, quòd in *pietissima*
Parente Tua EUEMIA non tantùm Avito Sanguine, sed
etiam vivis Pietatis Virtutisq; characteribus adeò distinctè
exaratum cernimus, ut hanc solâ visâ Omnium sese AN-
TECESSORUM Pietas Virtusq; primo statim offerat cui-
que obtutu. Atq; Tuæ hæc sunt Indolis Coronamenta
MUNIFICENTISSIME MECÆNAS, quæ de Majoribus
adduxi Tuis. Tuæ Virtutis incitamenta, quæ hîc lægentur,
tritâ viâ Sanguinis in Te hæc omnia redeunt, quæ à tan-
tis Heroibus promanârunt. Habes Majorum Tuorum in
Tuis Ceris adumbratam imaginem, quam non otioso tan-
tùm venereris cultu, sed in capacem transferas Indolem,
velut in candidam telam, cui tot spes de Te publicas &
vota ipsius naturæ artificio Illustris intexuit Lucina. Quòd
si altiora Tuus spirat animus, etiam in Cœlo Tui Sanguis
invenies imaginem, sed jam Sanctioribus dicatam Aris,
in B.

in B. STANISLAO KOSTKA S. J., ut totius Regni, ita à potiori Domûs Tuæ *Tutelari*. Altiùs illum quidem Sole suâ provexit Virtus, Maternam tamen ejus, Tuamque si spectes Lineam, vix sexto à Te distat gradu,; si ætatem, vix aliquot annis; si Sanguinem, ejus non postremam particulam in Te reperiēs, quam ex DOROTHEA KRYSKA, Avia B. *Juvenis*, per FELICEM ZIELENSCIUM in PARISSIOS, in Te tandem deductâ serie à *Perillustri Genitrice Tuâ*, utinam quàm diutissimè Superstite, EUFEMIA PARISSOWNA, *Castellanide Lublinensi* derivatam, ex monumentis *Illustrissimæ Domûs* PARISSIANÆ accepimus. Hinc ille *Avitæ Domûs*, hinc *Pientissimæ Parentis Tuæ* in minimam Societatem affectus, quasi per *Sanguinis* descendum innatus. Veluti *Divus* ille, cum tanto discrimine quæsitam Religionem diu in terris amare non posset, eandem, transfuso in Suos *Posteror* amore, hætenus complecteretur. Aut illi brevem *Prædecessoris Sui* inter mortales affectum erga eandem suo ut par est *Nomini* addictissimam Societatem ultro suppleturi susciperent. Utut sit satis documenti, quantum illis est cordi Virtus, quantum Sanctitas, qui unde in suum hæc profluxit *Sanguinem*, Sanctiori originem prosequuntur benevolentia. In Te hic splendor reflectitur PERILLUSTRIS MAGNIFICA DOMINA VEXILLIFERA WYSZOGRODENSIS. In cæteris *Domûs Tuæ* Majoribus, *Avitus* LEO Leonis retinet naturam; ast in Te Nomen tantum, cæterum Agnus est, totus Aris dicatus. Quanquam si pro Aris, & hic LEO, Agnus si ad Aras. Jovi *Pòetarum* Commentum Sacros voluit esse Leones; *Gentilitius* LEO *Tuus* non jam fabuloso Jovi, sed Sanctiori Numini semper Sacer fuit, ut qui nil præter pietatem vel in Te ipsa spiret, cujus vicem relaturi Superi, plures in Te dotes, quàm in commentitiam Pandoram suam effudèrè Dij. Si Te illa haberent Sæcula, Tua illa virili agendo prudentia, in loquendo cauteiâ, erga amicos Aris comitate, erga hospites humanitate, erga omnes benevolentia

lentiâ observatâ, suæ jam puderet Pandoræ, dum quod in ea fingerent, in Te velut in Iliade id totum collectum stuperent. Quis itaq; mirari audeat, quòd tot Tui Competitores habuisti in Consortem, cùm nullus tam improbatæ mentis est, cui virtutis amor non occupet pectus. Sed nulli melius nubere potuit Virtus quàm Virtuti. Te intelligo *Perillustri Magnifice Domine Vexillifer Wyssogrodensis*, qui ut in Te, ita in *Consorte Tua* nihil magis quàm Virtutem adamasti, quod ipsum Virtus quoq; est, omnia Virtuti posthabere. Absit invidia verbo, qui Te nôrunt & Illam, ultra omnem assentationem affirmare audent, quòd nec Illa Te sibi meliorem optare potuerit *Maritum*, nec Tu meliorem Illâ *Conjugem* Tibi invenire. Implent quidem cæteri Pœtæ monentis oraculum: *Si quâ parte velis nubere, nube pari*: sed tum se huic satisfecisse jam monito putant, cùm aut Fortunam, aut Sanguinis claritatem æqualem repererint; minùs de Virtutis solliciti conjugio, quo tamen nisi copulentur connubia, rarò alia ex illis speranda proles, præter dissidia & discordias. Vetustos splendores *Illustrissimæ Domus* PARISSOVIANÆ & GRZYBOWSCIANÆ spectasti in hac pagina, sed nec Tu minores sociasti illis, aut veriùs jam pridem per KRYSCIORUM Sanguinem sociatus ad augmentum splendorum accessisti. Ea namq; semper STAMIROWSCIANÆ Virtutis enituit dexteritas, ut accepta à STAVISSIO, Polonorum olim *invictissimo Herodæ* decora, per tot Sæcula ab Anno plus quàm 1022. semper in majus promoveret, donec ad illam gloriæ perduceret augen, in qua nunc PUŁKOZICIORUM stetit Nomen, quod ferè idem est cum LIGEZIIS. Quorum merita in Ecclesiam & Patriam vix ipsa capiunt Volumina. Sola quippe bonorum sortitio STAMIROWSCIANAM à LIGEZIIS divisit *Domum*. Utriusque, vel potiùs unius sub utroq; nomine, *Illustrissimæ Familiæ* si gesta memorare vellem, non has angustas paginas, sed integram STAMIROWSCIANIS *Laudibus* fatigarem Panegyrim. (Nam ut reliqua,

liqua, quæ sub pacis olea æternæ insculpenda memoriæ
gessere *Antecessores Tui*, taceam) Soli Marti foederata No-
mina lassarent pennas. Nimirum JOANNES, HIERO-
NYMUS, STANISLAUS, germani tam Sanguine quàm
Heroa fortitudine *Frates*, quorum primus non Patriæ tan-
tùm sub Gradivi Signis litavit Sanguinem, sed per exteras
quoq; Nationes victricia circumtulit arma sub MATHIA
Hungariæ Principe, à quo Præfecturâ Stabuli ob eximia do-
natus merita, docuit angustam esse Heroum virtutem, quæ
solis Patrijs clauditur limitibus. Et ne Heroæ fortitudinis
imitatrix deesset posteritas, suppres suo Gradivo reliquit
bellatores, DANIELEM, THOMAM, GEORGIUM, qui
ad Egram in Hungaria, maxima Martiæ indolis dedere spe-
cimina. Alter plurimis expeditionibus sub JAZŁOWIEC-
CIO, Supremo Exercituum Duce clarissimus, avitam pari
splendore illustravit Domum. Quid memorem reliquos,
JACOBUM, VLADISLAUM, LAURENTIUM, AN-
DREAM, JOSEPHUM, MARTINUM, STAMIRO-
WSCIOS, quorû alij sub LUCÆ ZOŁKIEVII *Capitanei Ca-*
luffiensis, alij sub MARTINI KAZANOWII *Campi Ducis*
labaris, Hungariam, Valachiam, Moschoviam victorijs per-
sociagrârunt, & prodigè fuso cruore non sine posthumæ fa-
seimæ mercede meruere stipendia. At verò ANDREAS
cum SIMONE MOHYLA *Palatino Moldaviæ*, dum sæpiùs
Turcicæ Lunæ fatigat cornua, docuit, quid sit non sine
victoria vinci, casibus stare, erigi ruinis, & ipsa morte
adire immortalitatem, quam proprio sibi transcripsit San-
guine. Reliquos fida recenset posteritas, quos angusta
non capit pagina STAMIROWSCIOS, quorum omnium
in Te uno redivos spectare licet spiritus PERILLUSTRIS
MAGNIFICE DOMINE VEXILLIFER. Quidquid illi
sub Sago vel Togâ gessere gloriosi, in Te uno ea relucet o-
mnia, cui successionis jure suam transcripsere famam. Ve-
rùm Tu non ignarus, quòd

Tota licet veteres exornent undiq; Cere

Atria, Nobilitas sola est atq; unica virtus. (Juven.)

Imò certum habes -- -- quod perit in illo

Gentis honos, cujus laus est in origine sola. (Lucan.)

Mavis Tuis eminere factis, quàm solis Avorum Armis propriam tueri gloriam. Idcirco plures eligis sub Tuo labaro militare virtutes, quàm Majorum numerare imagines, quarum in Te, nostris Sæculis genuinum exhibes prototypon. Nolo Tuæ pluribus modestiæ injurius esse, illud tantum suspicio, quòd non sine Numine Divùm, post auspiciatam nuper Hymenæi pompam, cum PERILLUSTRI CAPITANEA SULEJOVIENSI tantæ ac tantis

Fascibus insignes, & Jægum culmine tutæ

Convenère Domus,

in quibus non nili virtus, gloria, perennisq; habitabit fama, quæ Nomen Vestrum olim inferat astris. Tuæ hæc sunt emolumenta gloriæ, PERILLUSTRIS CAPITANEE SULEJOVIENSIS, ad Tui Nominis honorem tot Sanguinum nexibus colligati assurgunt Manipuli, qui Te suum stipent JOSEPHUM. Habes quod imiteris, habes unde ad culmen perennaturæ famæ connitenti invenias stimulos, quos ad Nominis petram PERILLUSTRIS VEXILLIFERI vicem nunc Genitoris gerentis, acues, sub cujus Signis centuriati meritorum Manipuli Tuo jam nunc junguntur Manipulo. Nam ego quibus jam amplius *Illustrissima Domûs Tuæ* Natales attollam encomijs, non reperio, quæ seipsa sustulit super Sidera in tot Tuis Antenatis, à quorum Umbris sereniores Tibi fluent Soles; dum Majorum Tuorum decora in Tuum transferes animum, avitisque Ceris Tuorum olim lucem addes meritorum, cujus non exigui in Te jam sese passim produnt igniculi, ut parem illis in Te excitent gloriam & accendant. Polonæ enim commune id, at GRZYBOWSCIANÆ etiam innatum indoli, quod

Nequit

*Nequit sub ipsis gloria fascijs
Latere, formosamq; pulchris
Invidiam coquit in medullis.
Avita virtus, nescit idoneus
Tepere parvis candor in artubus,
Primog; vagitu Polonis*

Esse licet generosiores. (Ines Ode 66.)

Jam in prima ætatis aurora innubem portendis Hesperum, jam ex unguē Maternæ Stirpis appares Leo, jam ad auream gloriæ messē Avitas acuis Falces, jam cum Crucis Signo teneræ pietatis attollis indicia, jam armatam manum porrigis ad magna, eaque in Avitis Ceris futuræ Virtutis Tux honestiq; ponis lineamenta, ex quibus quantus futurus sis, non vanos tot Augures habes, quot Tux indolis curiosos inspectores, qui jam id tacitis de Te musitant votis:

Ille nativos animabit ausus,

Ille vernantes cumulabit olim

Patriæ lauros, memoresq; laudum

Eriget horas. (Ines Ode 63.)

Quod ut è voto Patriæ cedat,

Dij probos mores docilis juventæ provehant in melius, donec cum corpore mens crescat ad ardua, cum annis virtus, cum viribus merita, cum tempore honor, ut quidquid in Tuo animo, sive Materna sollicitudo, sive pervigil Palladis cura inseverint, Tu plenâ postmodò Falce metas. (Ovid. 14. Metam.)

APODOSIS PHILOSOPHICA.

Saturno ideo falcem Antiquitas tribuit, quòd temporum sæculorumq; sit Præses. Certè Antiquitate suâ Logica superat Saturnum, utpote quam non fabulosus Pòëtarum partus, sed primus Author naturæ unà cum primo Protoplaste nostro edidit in lucem. Si verò Platonicis credere fas est, qui Mundum ab anima quadam regi existimabant, idcirco regnum Saturni rationale, uti regnū Jovis

Jovis, regnum animæ sensibilis dixere, (*Maß. in Spec. imag. c. 22.*) intellectum humanum utpote hujus regni hæredem Saturnum appellare liceat. Saturnus Romanis veritatis parens creditus, idcirco non aliter ei sacra, quam detecto capite facere solebant, quod veritas diu testata latere nequit, (*Plut. in quæst. Rom.*) quod soli intellectui proprium est, qui in veritatem, velut in propriam sobolem, eo fertur affectu, ut nullo conatu ab ea dimoveri possit. Saturno offerebantur capita & ora hominum. (*Polydor. l. 3. c. 1. de rer. invent.*) Cui verò majus in caput jus & ora Sapientum, quam intellectui competit. Nihilominus nisi in consortium rationalis regni admisisset Logicam, sæpius pro veritate falsitatem pareret. Hæc enim cum ipsum regat intellectum, reginæ & ipsa in regno rationali merito vendicat nomen, ita tamen, ut nec ipsa regi dedignetur, quod eximie virtutis est. Nempe

Qui regit & regitur, rectius ille regit. (*Maß. in font. arg.*) Ut Saturnus ergo, ita etiam Philosophia rationalis, & intellectus habet suam falcem, quam tamen in alienam messem non mittit, cum omnia sua sint. Prima operatio falx quædam est mentis, quæ, quidquid sensibus ingeritur, apprehendit & metit. Adeo verò subtilis aciei est, ut non flores modò, sed adamantes & lapides scindat, nec tamen hebescat. Falx discretiva est unius rei ab alia, idem primæ operationi commune, imò hæc ab una re plures discernit. Itaq; ut Messoris Falcem perita manus, ne urticas pro floribus & gramine metat, ita Logica primam intellectus operationem dirigat est necesse, ne quid pro quo apprehendat. Unde sequentes deduco

CON-

CONCLUSIONES.

- I. **L**ogica est Scientia strictè, directiva operationum intellectûs, eaque speculativo-practica.
- II. Objectum ejus materiale sunt omnes res in communi, formale verò tres mentis operationes.
- III. Est virtus, idq; secundum omnes sui partes.
- IV. Distinctio realis consistit in ipsis entitatibus rerum.
- V. Inter gradus Metaphysicos datur præcisio objectiva, perfectè præscindens unum gradum ab alio, per quam fit & universale.
- VI. Oculus corporeus præscindere nequit.



D

DI-

DISCVRSVS SECVNDVS DE CRUCE.



Omibus quidem Gentilitiorum Armorum Ce-
ris suus debetur cultus, utpote quibus vel
fortunæ, vel Heroæ Virtutis, vel Sapientiæ
impressa est Imago; Cruci tamen tantò ma-
jor, quantò majus illi ab ipso Authore omni-
um decorum & splendorum pretium inditum est. Ter-
renorum Principum favor cæteris cudit arma, sed quibus
solam quandoq; Fortunam, non Virtutem tuentur multi;
imò iisdem sæpiùs Virtutem jugulant, dum pro suo San-
guine ultra quàm fas est decertant. Cruciorum Familiæ
non nisi sola Virtus suæ gloriæ faber est. Nempe cui Vir-
tutum Dominus, & ipsius Rex gloriæ Victricia Crucis con-
tulit arma, quæ soli Virtuti militant. Ac proinde vel ab
ipso Authore majorem sortiuntur honorem. Veteribus
quidem Gentilibus Crux probro erat, nec nisi infelicitatis
tesera. Hinc Athenienses eorum, qui infelici perierint
morte, tumulos notabant Cruce, (*Suidas.*) quasi umbris
tantummodò, non luce digna foret. Verùm postquam
in triumphale labarum Authori Vitæ cessit, tantum lucis
intulit mundo, quantum vel ad ipsas illustrandas Majesta-
tum Serenitates plus quàm satis est. Crux namq; modò
eminet in Regum Verticibus, fulget in Coronis, triumphat
in armis, utpote certioris victoriæ omen, quod sub Cru-
cis præsidio; plerisq; cum Constantino datum: *In hoc Signo
vinces.* Ut non immerito Cruci inscripserit quispiam:

Hic decus, & factis seges, hic uberrima vestris,

Laurus, & hic vero Principe digna viret.

Hic Aquila cessere Cruci, vastumq; per Orbem

Crux est Augustis gloria prima Viris.

Hæc fortitudinis index, victoriæ prodroma, Heroum Cly-
peus.

(Joan. Bech. ad
Princ. Christianos
in Lipso.)

S peus. Unde Constantinus post triumphatum opē Crucis Maxentium, in trophæum eidem erectæ inscripsit: *Hoc salutari Signo, veræ fortitudinis indice, Urbem vestram vindicavi.*

(Roman. alloquitur.) Theodosio verò cum Eugenio Tyranno Signa collaturo, dum belli Duces Principesq; differendum suaderent prælium, ob innumeras hostis copias, respondit: *Absit, agnus, Exercitui meo Crux præit, illius copias Hercules ducit;* secutus præeuntem Crucem, & victoriam assecutus. Quidam verò Cruce pro Clypeo usus, illud pro Lemmate inscripsit: *Assueta triumphis.* Hinc D. Enno:

At mihi Crux Cuspis, Crux Scutum, Cruxq; Corona,

Hæc legar, hæc feriam, hæc & pacis fœdera firmem.

Isabella, Sigismundi I. Regis Poloniarum Filia, Hungariæ Regina, à Solimano Turcarum Imperatore armis adacta, dum Ferdinando Imperatori Romano ex pacto Coronam Hungariæ non sine lachrymis, quibus suam & Filij, necdum Sceptro maturi, sortem deflebat, porrigeret, accurrit dilectus filius fietus causam Materni investigans: cui illa illachrymata inquit: *ô Fili, Fili, & quomodo lachrymis temperare possim, quæ mihi & tibi omnia amisi, & quod ultimum restabat solumen, Coronam reddo.* Filiolus fato quodam lapidam è Corona Crucem quam invenerat, depromens, sic Matrem affatur: *En ô Mater, pars potissima Coronæ in meis mansit manibus, non desperandum.* (Bielscius fol. 596. apud Okolsk. Tom. 1. fol. 124.) Quod si Regalis Coronæ pars potior Crux est, quidni in Gentilitijs Cruciorum Stemmatibus Avita Crux Principem vendicet locum. Via Crucis via lucis est, (*Apel. Symb.*) in qua Avitæ Domûs uberior radiat splendor, cui venerabilior *de Cruce surgit honor.* (D. Venant.) *Ex radijs lux nata Crucis,* (D. Atrat.) Nulibi illustrius, quàm in Prussorum ardet Ceris, quas Crux ad alta vehit. (*Damasus.*) Divo Maximo Crux Virtutis propositum, & meta est, huc dum Heroum collimat animus, quo natura negat, *Crux facit ire viam.* (Venantius.)

APODOSIS ETHICA.

Ardua Virtutis via est.

SToicorum opinio erat, homines omnes per naturam ad solam Virtutem esse proclives; vitium extrinsecus accidere, nullamq; radicem & semen, in nostris animis per naturam possidere. Præsertim cum ea boni conditio & natura sit, ut expetatur ab omnibus, Virtute autem quid melius. Iisdem suffragari videntur & Academici, qui perinde se habere hominem ad Virtutem dicebant, ac se habet ad Scientiam. Cum itaq; omnes naturaliter scire desiderant, per consequens per naturam ipsam ad bonum & Virtutes proclivorem esse hominem, quàm ad vitia. In quod autem fertur natura, facilius consequi potest. Attamen quàm id alienum sit à veritate, præter quotidianam experientiam, communis omnium consensus est. Oppositum vel inde colligere fas est, quòd omnes naturæ quâdam propensione ardua fugimus, sectamur facilia. *Descensus ad vitia facilis est & jucundus, ardua sensuiq; molesta est via Virtutis.* (Picolom. cap. 5. de Virtute.) Hinc illa veterum, recentiorumq; testimonia Pœtarum: *Facilis descensus Averni, sed revocare gradum, superasq; evadere in oras, hic labor, hoc opus.* (Ovid.) Et alibi: *Difficile, fateor, sed tendit in ardua Virtus.* (Idem lib. de Ponto.) Et Plato in 2do de Repub. Pœtæ canenti subscribit:

Mortales vitium penitus labuntur in omne

Præcipites, quoniam facilis via ducit ad ipsum,

Hoc quia vel nobis jam tum nascentibus hæret.

Rectè Synesius: *Maxima sine labore consequi, proprium Divinitatis est; à nobis autem nedum Virtutes, verum cætera quoque præclara sudore quærantur. Ad vitium pervenire facile est, & admodum prope habitat; ante Virtutem autem sudorem posuere Dî, longamq; viam & arduam.* (Hesiodus.) Ardua Virtutem profert via.

Nam

Nam cuivis homini vitium sese eggeret ultro,

Virtutem at posuere Dij Virtute parandam. (Sil. Ital. l. 11)

Antiquis Virtus credita est habitare in rupibus aditu difficillimis & asperis, in ijsq; secretiorem, insuper & occultum habere locum, quod nec adire facile, nec conspici possit. (Clem. Alex. 4. Strom.) Huc collimat Poloni Vatis iudicium: *Vite degenerem carpinus orbitam.*

Erramus; procul arduis (Sarbiev. l.

Virtus se nimium seposuit jugis. 4. Ode 10.)

Itaq; omnibus ignavis clavius est ad Virtutem aditus. Iter namq; ad bonos mores non otio, sed labore, & studio, & operâ aperiendum. Magi apud Persas, cum Virtutem in nullo ætatis ambitu certam habere sedem adverterent, rerum omnium Reginam dixere, ideoque exteri hominis habitu, & peregrini imagine donabant, quod Virtus nunquam otiosa quiescat. Cæteri armatam effingebant Virtutem, quod sine vi, sine pugna capi non possit, nec Soboles ejus gloria ignavis unquam in prædam cessit. Anaxagoras, ut Virtutis opus laboriosum exprimeret, Manum Virtutis Symbolum pinxit; quia manus quasi munus dicitur, quod assiduo labore Virtuti incumbendum est. Hebræi pro Symbolo Virtutis Solem proponunt. Sanè non incongruè. Nam ut Solem, ita Virtutem nunquam otiosam videris, aut in suo torpentem cursu. In Nummis Veterum Imperatorum pingebatur Virtus Amazonis galeatæ specie cum lancea & gladio, pede altero galeam, altero globum calcantis. Virtutis nempe est, & agere, & pati fortia. Cæteri arduum Virtutis expressuri iter, pinxere Olympum, mediam æris Regionem superantem, quem torrentibus & præcipitijs impeditum horrent multi ascendere; Alij superasse lætantur; in cujus superficie ad Aram Virtutis & honoris Athletæ sacrificant. Epigraphe: *Supra hyemes Boreaq; minas.* (Bochius apud Mass, in Spec. Imag. c. 4.) *Vide, quàm altè ascendere debet Virtus, scies illi non per secura vadendum esse,* ait Seneca de Provid. cap. 5. Et alibi:

*Virtutis est domare quæ cuncti pavent. (in Herc. fur.) Et certè
Explorant adversa Viros, per quæ aspera duro
Nititur in laudem Virtus interrita Clivo.*

Adeo non molli, sed asperâ adeoq; Crucis viâ ingredi so-
let Virtus, ut Virtutis amittat nomen, si ab arduis defle-
xerit; Nempe

*Quæ latet inq; bonis cessat, non cognita rebus,
Apparet Virtus, arguiturq; malis.*

APODOSIS PANEGYRICA.

ATque hoc est proprium GRZYBOWSCIANÆ Do-
mûs ad Virtutem iter, per bella, per cædes ab ipso
ducere opes animumq; ferro; non molli Sardanapa-
li, aut Sybaritarum semita ad gloriæ contendere metam,
per quam solis vitij trita via est. Arduos ad Virtutem
nisus vel ipsa Gentilitia CRUX prodit, quæ Lydius lapis
Virtutis est. Nulla quidem obtentu facilis Virtus, ast o-
mnes simul tenere, ac velut uno assequi passu cæteris vix
possibile, GRZYBOWSCIANÆ Domûs Heroibus jam ipso
usu commune, qui unam, alteramve Virtutem sine alijs,
aut nullam esse, aut imperfectam credunt. Dedignati il-
lorum ingenium, qui mille stipati vitij, si unam fortian-
tur Virtutem, Cœlo se pares credunt, cum tamen disso-
ciata ab aliorum consortio utcunq; ingens Virtus, veriùs
pallium scelerum est, aut vitiorum custos. In Illustrissi-
ma Domo hac nunquam solitariæ incedunt Virtutes, quin
iuncto fœdere Fortitudo fulciat Religionem, Religio fove-
at Pietatem, Pietas accendat Zelum, Zelus Superùm Amo-
rem tueatur. Nimirum non est, cur ex medio Illustrissi-
mæ Gentis hujus fugiat *verumque, fidesque*, aut *ultima Cœ-
lestium terras Astræa relinquat*, quibus sola ferrea ætas lo-
cum negavit. Ast verò sub GRZYBOWSCIANIS Fal-
cibus aurea semper regnant Sæcula, quæ meritum sunt
feracissima. Sonat etiamnum Vestræ Veritatis Echo *Illu-
strissimi Heròes* pro libertate Lechiæ, in tot publicis Regni
Con-

Congressibus, ad Consi repercussa aures, quâ alteri pro Patria tonabatis Pericles, & felicius Gallicano Hercule, aureâ oris facundiâ toties omnium mentes & animos captivâstis, quoties non tam Terrestres Legati, quàm Cœlo missi Mercurij dicebamini. Nunquam enim liberiori lingua veritas loqui visa, nisi cùm Vos pro libertate, liberima facundi oris voce, illud tonaretis:

Quicumq; libertatis olim

Hostis erit, simul & Polono

Dicetur hostis. (Ines Ode 4.)

At verò incorruptam fidem vestram in Patriam, vel ipsa Gentilitij Stemmatis testatur tessera, in qua armata gladio manus ad nulla paratior bella, quàm quæ pro Orthodoxa fide geruntur & Patria. Eodem gladio, etsi suus deesset, satis secura stetit Astra, in tot Judicijs, quibus Tribunalitij aderatis Assessores. Assedistis ad libram justitiæ, sed non prius animi vestri deprompsistis sensa, quàm librato rationum pondere præponderaret veritas. Si *magnos homines Virtute metimur, non fortunâ*, (Cornel. Nepos in Vir. Eum.) qui Vestræ magnitudinis anceps est, tot tantasq; consulat Virtutes, quas parvi esset à Majoribus relictas conservasse, nisi etiam Novis Veteres, quisq; Vestrum cumulasset. Quanquam rarò Majorum posteris suffragatur Virtus, imò probro non paucis est, cùm facile degeneres prodat. Sed illorum hæc crisis est, qui in splendoribus Aboriginum suas amant tenebras, aliena contenti luce, quam si extinxeris, omnem simul Posterorum existi gloriam. Illustrissima GRZYBOWSCIANA Domus ut ignis augetur ab igne, luce una nutritur lux alia, ita illorum Virtutis splendor ab uno reflexus in alium, cumulatior ad suum redit principium. In hac Virtutum luce, velut in speculo proderis PERILLUSTRIS CAPITANEE SULEJOVIENSIS, aut verius Tu Speculum es, in quod Illustrissimi Domus Tuæ splendores concentrantur, ut olim universam effundantur per Lechiam, qui nunc in

ortu

ortu teneræ ætatis nondum plenis erumpunt radijs. Nihilominus ut ab ortu futuræ serenitatis anguria non obscure capiuntur, & in aurora proditur Sol, qualis in meridie appareat, ita è tenera indole Tua ille sese ostentat animus, qui ad magna nullis unquam egeat calcaribus. Cœlitus quippe hæc est Virtutibus indita natura, quod nec si velint, latere possint:

Est vanus labor ---

Celare magnæ velle Virtutis faces.

Excelsa Virtus proditrix ipsa sui. (Avanc. in Canut.)

Mollem itaq; in Ceris Avorum arripiant cæteri viam, Tibi non nisi prælucebunt illæ, ut arduam ingrediaris ad Virtutis iturus apicem, in quo Te prodroma expectat Fama. Enim verò si cui arduum Virtutis iter, ast non GRZYBOWSCIANIS ausibus, qui toties *negatî tentant iter viâ*. Sequere & Tu magnis passibus! imò verò sequeris, donec in apice olim meritorum, honoris, gloriæq; constitutum, uti Illustrissimos Prædecessores Tuos, ita

Et Te per populos garrula differat

Bigis gloria candidis,

Et seris recinat Fama Nepotibus. (Sarbiev. l. 2. Od. 9)

APODOSIS PHILOSOPHICA.

CRux alijs est Philosophia Regum, alijs Veritatis Magistra. (*Cbrys. & Andr. Archiep. Creten. de Cruce.*) Cæterum ipsa Philosophia Crux est, præsertim Rationalis, quæ non sine mentis cruciatu inter tot Logices discitur spinas. Habet enim vel ex ipsa Porphyrij Arbore tot Cruces. Crux prodroma judicij est. Etiam Philosophicum judicium non una præcedit Crux, in quam sapius agitur Veritas. Imò nec inveniri alibi facilius potest, nisi in Cruce, quam ex contradictorijs & æquipollentibus propositionibus ipse sibi Rationalis fabricat Philosophus. Ita Rationalis quoque Philosophia inter præcipua suæ Nobilitatis Stemmata, ubi primum ad judicium descendit,

scendit, Crucem gerit, quam in ipsa Dialectices adolescentia suis præfigit Ceris, atq; ideo in solo Philosophico judicio invenitur Veritas. Hinc sequentes deduco

CONCLUSIONES.

- I. **V**eritatis complexæ non est capax prima mentis operatio, sed propositio.
- II. Ex duabus Contradictorijs necessario una est vera, altera falsa; ideoq; propositiones de futuris contingentibus sive conditionatis, sive absolutis, sunt determinatè veræ vel falsæ.
- III. Propositio semel vera non potest transire in falsam, nec è contra.
- IV. Veritas propositionis consistit in actu & objecto taliter se habente.



E

DI-

DISCVRSVS TERTIVS. DE GLADIO IN MANU ARMATA.



Ladij inventorem Vulcanum tradunt Pòetæ, qui primus adamantinum gladium obtulit Perseo, quo hic Andromedam, Cephei Filiam, à bellua marina tuitus est, eodemque Medusam, unam ex Gorgonibus, occidit. Martis gladius apud Scytharum Reges olim servari solebat, quo quicumq; potiretur, ei Regnum sperare fas erat, quasi nemo Regno aptior esset, nisi qui gladio ad illud aperuisset viam. (*Zingerus l. 5. volum. 5.*) Illud lepidum de gladio Attilæ. Pastor quidam cùm suam buculam claudicantem advertisset, diu vulneris causam scrutatus, gladium reperit, in quem casu impeggerat bestia; hunc ad Hunnorum Regem Attilam attulit, quem Rex grato accipiens animo, omnium se Regnorum Dominum hoc victore gladio ominatus est: & reverà omni respondit eventus. (*Bomfius l. 3. Decad. 1.*) Scythæ barbariores gladium pro Numine colunt. Sub aggere enim farmentorum quadrato ferreum asservant ensen, qui omnium vetustissimus est. Id pro Martis Simulacro magna apud illos religione colitur, cui annuas hostias hac methodo offerunt: ex captivis centesimum quemque ad quoddam vas mactant, quorum cadaveribus igne absumptis, gladium cruore perfundunt, eumq; sic sanguine potum pari cultu suo reponunt loco. (*Herodot. l. 4.*) Lycaonis etiam Gnosij celeberrimi artificis apud Pòetas gladij celebres sunt, quorum unum obtulit Ascanius Euryalo pretiosissimi doni loco,

--- humero simul exiit ensen

Auratum, mira quem fecerat arte Lycaon

Gnosius, atq; habilem vaginâ aptârat eburnâ. (*Æneid. 9.*)

Sed

Sed Vulcani tamen præ cæteris celebriores gladij, nempe quos non in profanos usus, sed Dijs in vindictam fabricarunt; Ex his unum Dij dono dedere Peleo in symbolum heroæ virtutis suæ. Quo quidem utens ille in prælijs & venatibus consequebatur, quidquid optabat. Hinc antiquum adagium originem sumpsit in eum, qui præter modum re quapiam insolens, ac tumens est: *magis sibi placet, quàm Peleus suâ macherâ.* (Erasm. in Adag.) Cæterum à Dijs offerri gladium, nihil aliud esse, quàm victorias è Cælo venire voluere Antiqui. Sed quod apud illos superstitione quadam, apud Orthodoxos religione certum est. Testis est Boleslao Chrabri cœlitus delatus ensis à quodam ex Tutelaribus, cum quo vincendi quasi potestatem accepit Pius Rex, cui Cælum militasse visum, unde non gladium modò, sed & Heroam accepit manum. (*Ines in Lech.*) Hoc gladio, qui in ærario Reip. asservatur, etiamnum in Coronationibus Poloni inaugurantur Reges, sed utinam cum eo etiam manum cœlitus victricem accipiant, quæ talem gladium vibrare nòrit, cùm non quælibet suo par ponderi est. Hinc ille alter sui ævi Alexander Scanderbegus, à Turcarum Solimano requisitus de gladio, quo tot victoriarum misuit laurus, quot Bissurmanorum capita utcunque armata galeis, cingulotenus non difficile diffindere potuit; misit quidem gladium, at simul moneri voluit mitti à se gladium, sed non manum, quæ parem suæ fortitudini ensẽ iterum facile repertura erat. Auream quidem manum, quâ Fortuna retineatur, offerre possunt Reges, ut Krzywoustus Zelislao Strenuo Duci, in vim repemissæ manûs in prælio, (*Ines in Lech.*) sed strenuam, & cætheroam, quâ ipsa fortuna domari possit, & victoria, quocumque se occasio obtulerit, obtineri, non nisi suffragante Virginitate Cælum donare potest. Inviæ fortitudinis semper index est gladius, si tamen pro aris & focis, non contra dimicet. Hinc Ægyptij Regem suum gladium vocant. (*Picrius l. 56.*) Gladium quasi Cladium, à clade dictum, putat

putat Lipſius, (*de milit. Rom. Dialog. 3.*) cùm non in alium uſum deſtinatus ſit, niſi ad clades in hoſtibus faciendas, quas qui plures conſecutus, gladij & ipſe nomen merebatur. Sic Claudius Marcellus à Romanis dictus, ob rem promptè, & ſine cunctatione cum hoſte geſtam. Memorant Annales Franciæ, Rolandum Herodèem fortiffimum, Caroli Magni Nepotem, gladium habuiſſe, cui nomen Durandulo, à duritie fortàſſe inditum erat. Arturnus Britonum Rex, qui circa Annum 1420. vixit, habuit gladium, dictum Caleburnum, quo, unico prælio 470. hoſtes occidit. (*Sigebert. in Chron.*) Cambiſæ gladius, quo in bellis utebatur, in ædibus Bellonæ ad aram ejusdem appenſus, quo nefas uti erat, niſi ad juſtitiæ adminiſtrationem. Eum cultum habent magnorum Heroum gladij, quos ſtrenua manus nunquam rubigine hebeſcere permittit, quin Heroicis factis ad ſplendorem expoliret gloriæ. Prufforum id præ cæteris gladio tribuendum, quodd nunquam otioſa delituit vaginâ, ſed ſemper ad manum eſt, imò in manu, quæ dum pro avita Cruce ſtriſto vel in ipſo Stemmate excubat enſe, meritò illi inſcripſerint: *Vno Patriamque, Eademq. defendimus iſtu.* (Barlæus.) Aut illud Propertij: *Quantum ferro, tantum pietate potentes.* Henricus IV. Rex Galliæ, gladium in Ara ſub Corona pictum pro Symbolo geſſit, additâ teſſerâ: *Pro Ariæ & Regni cuſtodia.* Certè hic dignior Ariæ gladius, quem ſuper Crucem, velut ſuper Aram, heroica hætenus ſuſpenſum tenet manus, nimirum ſemper in deſenſionem Orthodoxæ Religionis Crucisque parata.

APODOSIS ETHICA.

Ab Heroa Virtute glorioſior honor.

Voluptates corruptibiles, honores immortales dicebat Perianther. (*Lært.*) Sed id tam procul à vero eſt, quàm procul Virtus à ſcelere & vitio diſtat: cùm ut vitia

Virtu-

Virtutem interdum mentiuntur, ita honores indignis col-
 lati, nec immortales sunt, nec veri honoris merentur no-
 men. Imò passim hujusmodi Honorij *tolluntur in altum, ut*
casu graviore ruant, secumq; etiam ipsas Respublicas trahant
 in perniciem. Suntq; instar iniaginum illarum, quæ ita
 per artem aptatæ sunt, ut si ponas in sublimi, totum ar-
 tificium pereat, aut omnino oculos effugiat. Romani ut
 præcluderent immeritis ad honores ambitum, honoris &
 Virtutis ædes ita junctas sibi struxerunt, ut nemini ad ho-
 noris basilicam pateret aditus, qui non prius in Virtutis
 stetit atrio, ad ostendendum, ut ait Symachus, (*l. i. E-*
pist. 12.) ibi esse præmia honorum, ubi sunt merita Vir-
 tutis. Planè in rem nostram Claudianus: *Emitur sola Vir-*
tute potestas. Optimè enim ibi rerum agitur administratio, ubi
sola Virius sui pulcherrima mercede cõemittit potestates. (Turturet.
c. 4. de Nob. Gent.) Onerat honor, non ornat, & ple-
 rosq; frangit, quibus succolatrix Virtus nullum tulit au-
 xilium: Quodq; de Nerone, idem de cæteris sine Virtu-
 tutum adminiculo ad honores provectis fas dicere: quòd
 in eos Fortuna cum honore projicit imperia, ut frangat,
 & deprimat. *Honores certè ita gerere debemus, ut ornamen-*
tum non accipere, sed dare ipsi dignitati videamur, (Justin.)
 quod à sola Virtute haberi potest, quæ sola & ornamen-
 tum, & ipsa sibi pretium. Hinc est, quòd illam vel *In-*
vitam blande vestigat & ultro, ambit honor. Reverà enim
non Virtutibus ex dignitate, sed ex Virtute dignitatibus accedit
honor. (Bòetius lib. 2.) Sed ut cæteris Virtutibus comi-
 tem honorem nemo negaverit, ita præcipuè fortitudinis
 pene individuum dixero, cum nunquam suo honore he-
 roa careat Virtus, ac vel ideo firmior hic, quòd non mol-
 li teneatur manu. Si enim *Fortuna fortes metuit, ignavos*
premit, (Seneca) quidni iisdem honores ad nutum sint.
Sceptrum teneri Regium hac dextra decet, quæ fortiore brachio
ferrum vibrat. (Avanc. in Tragœd.) Et sanè

Fortu-

*Fortuna fortes ipsa subit manus,
Fugit remissas, cui gravis ad latus
Dependet ensis, obsequentem*

Ipse sibi parat ense sortem. (Ines Ode 4.)

Quotquot in antiquis Simulachris honorum reperiuntur imagines, aut Virtuti, aut fortitudini, quæ primum inter Virtutes tenet locum, sociatas videris. Sola ambitio aut solitaria est, aut sola in consortium sui trahit scelera. In Vitellij numismate Honor galeato capite expressus erat, hastam dexterâ præferens, sinistrâ cornucopiæ, è diametro Virtuti adstans, mutuo se contemplando. Porro Virtus formâ Juvenis galeati, cum pennis supra galeam, hastam sinistrâ, dextrâ autem Sceptrum, aut Columnam sustentans. (*Pierius in Hierogl. l. i. c. 34.*) Cæteri pingebant Honorem purpurea veste indutum, laurea coronatum. Apud reliquos adolescens venustus, laureatus, hastæ innixus, cujus aureus collum torques, armillæ brachia ornant, &c. Quid hæ Honoris imagines, nisi prototypon hujus ob oculos exponunt Veritatis? nunquam gloriosum, aut stabilem Honorem esse, qui fortitudini junctus non sit. Nam primum Hieroglyphicon sic ipse explanat Pierius; habet caput galeatum Honor, ut fortitudine esse opus indicet, eandemq; ob causam hastam gerit. Virtutem contemplatur. Ubi primum enim ad hanc cæcutire cæperit, per vitiorum titubando præcipitia facile calurus, & ipse scelerum mancipium sub hastam ibit. Sed ut paucis complectar omnia: Nullus certè honor aliunde habuit ortum, nisi vel à fortitudine, vel ab alia Virtute. Unde Nobilium Stemmata sumpsere initium? Unde tot Heroibus præmia honoris, Torques aurei, Annuli, Scuta, Parmæ, Umbones, Hastæ, Honorarij Enses, tot Coronæ Murales, Civicæ Obsidionales, Navales, & sexcenta alia honorum insignia, ex campo Martis & Bellonæ collecta? Si ad primam redeamus originem, sola omnium fortitudo parens & genitrix est. Nec mirum, quotidianâ ferme experientiâ compertum est, quòd qui

Maxi-

Maximus est armis, maximus ille togâ. (Stat. 4. Theb.)
Ut enim fortes in Marte Viros, animiq; paratos, eosdem sic
justos in pace legis. (Claud. de Con. Honor.)

APODOSIS PANEGYRICA.

UNa Virtutis per ardua via est, multiplex Honoris,
PERILLUSTRIS CAPITANEE. Præit alijs ad ho-
norum fastigia cæca ambitio, cum qua postquam
per fas & nefas ad summum venit gradum, ad imum
relabi eò velocius est necesse, quò tardiùs in sublime ob-
stante scelerum mole quispiam luctabatur. Et quod ma-
gnis anilibus, idem magnis fastigijs, ad quæ Virtus non
struxerat gradus, commune est, ut in se magna ruant.
Nec ullis bene Phæetonteï hi cessere ausus. Apparere
quidem tantisper in sublimi possunt, sed diu hærere nun-
quam, cum & ipsa ambitio præceps sit, & præcipientes fa-
cit, quos fulcire incipit. Pleriq; fortunæ inhærent vesti-
gijs, ne à via honoris aberrent, sed nec illi securum ar-
ripiunt iter, aut saltem multis erroribus implicitum, in
quos velut in Labyrinthum non unus impegit Theseús,
ut vix filum redeundi inveniret. Aureis quidem fortu-
na passibus insequitur honorem, sed vel ideo tardis, cum
nullus sit, qui non ad ejus prociduus pedes remoram in-
ijciat. Et licet volubilem quandoq; suis asseclis impellat
rotam, sæpe tamen ipso celeritatis impetu hac fracta in
cœno reliquit, quos Cœlo jamjam invehere credebatur.
Quod si aurea interdum cum Timotheo in capturam ho-
norum explicet retia, rumpuntur si nimij sint, aut ijsdem
irretitos retibus, avidos sui Piscatores invidiæ mergunt
fluctibus: si minores quàm sperari poterant, plus damni
quàm lucri daturi, vacuas non implent manus, aut vici-
nas elabuntur. Pervium quippe nimis fortunæ rete est,
in quo facilius vile lignum, quàm ex ligno hæret Mercu-
rius. Deniq; & ipsa cæca est; Hinc sæpe dum vicinas
despicit, remotas venando dignitates, utrâque frustratur
prædâ.

prædâ. Sunt, quos secundiore Zephyro Principum favor
provehit in sublime; verum & horum multi Icarum de-
dêre Orbi, dum gratijs suorum Mecænatum ceu pennis
fisi, altiùs evolando præ cæteris, vehementiori tumidi
fastûs abrepti turbine, priùs capitum allisere apices, quàm
in apice, ad quem collimant, subsisterent. Adeo nec per
ambitionis avia, nec per aurea fortunæ vestigia, nec per
favorum inane securè itur in altum, nisi Virtus manu-
dtricem porrexerit manum; cui soli è vestigio honor est,
imò ne procul ab ejus tardior relinquatur vestigijs, sæpè
ut alter Hyppomenes suam hanc Athalantam aureis alli-
cere conatur pomis, quibus aliorum palatum irritat tan-
tùm, non satiat. Illustrissimæ Domûs GRZYBOWSCIA-
NÆ Herodës non alio, nisi Virtutis itinere ad Honorum
connituntur summa, quibus per tot Majorum merita, Re-
giam ipse Sanguis aperuit viam. Fortunæ alij suæ, non
sibi debent fasces, quos gerunt, sine injuria repetendos,
utpote in quos nullum meritorum jus contulit Virtus. At
verò GRZYBOWSCIANO Sanguini hæreditario jure de-
bentur dignitates, in quas tot bello & pace, Togâ & Sa-
go exantlati labores heroo sudore perenne jus inscripsê-
re. Ingloriam sibi crederet gloriam gratuitis potiri ho-
noribus magnanima indoles: cùm qui præter merita ve-
niant, ornatos tantùm, non honoratos reddunt. Ut enim
exanimem Statuam Regijs onustam insignibus utcunq; in sub-
limi colloces, ornâsti tantùm, non honorâsti. Ita quos altio-
rës ad rectè facta non animant spiritus, utcunq; in excelsis
emineant culminibus, infra communem jacent æstimatio-
nem. Nimirum, *Simiam esse Simiam, etiamsi aurea gestet in-
signia*. Tam procul ab hoc probro Aborigines Tui, PER-
ILLUSTRIS, MAGNIFICE DOMINE CAPITANEE,
semper sunt, quàm proximè Virtutum insistent vestigijs,
per quæ ipse in Avitam Domum Vestram sæpiùs se invitat,
imò ultro etiam irrumpit honor. Dabunt fidem Lubli-
nenses, Varsovienses, Inovladislavienses, Czynscenses, Nu-
renses

renses Curules, Capitaneales; cæteriꝑ; toties gesti fasces,
quos nunquam sibi prætulit ambitio, nec tam immeritus
Principum favor, quàm justitia pro meritis contulit; ad
cujus libram si Vestræ Domûs revocarentur merita, etiam
maximos honores infra illa decrevisset Themis. Quodsi
Mavors etiam suum adjiciat suffragium, certè priùs præ-
mia meritorum deficerent, quàm quæ præmientur meri-
ta. Sive enim Martis arenam ingressi sunt, fortitudo præ-
ivit signa, sive onusti ab arena descenderent laureis, nun-
quam sine comite victoria redière. Si cui amara sunt
Martis bellaria, utpote quæ sæpiùs cum sanguine regerere
est necesse, ast non GRZYBOWSCIANO Nomini, cui
non priùs tractasse arma contingit, quàm vel in Lucinæ
prætecta reptasse per Scuta, nec alium etiam tum sibi lu-
dum esse, quàm Martis exuvias. Martem sequuntur ple-
rique, ut fugitivam assequantur fortunam, aut ferreos en-
ses aurea sæpiùs acuant cote. Meritò hos avaritiæ dixe-
rim militiam, utpote qui plus suæ cupiditati, quàm glo-
riæ militant. GRZYBOWSCIANA Domus pro integri-
tate Poloni Martis etiam propriæ toties non pepercit for-
tunæ, quoties illam in publica necessitate sub Gradivi du-
xit Signa in suppetias, nunquam feliciorum se rata, quàm
cùm felicitati Patriæ suam consecrasset. Loquentur sera
fata, loquentur Posterii invictam fortitudinem, loquentur
liberalitatem ILLUSTRISSIMI Capitanei Varlaviensis
PROAVI Tui, qui è proprio ærario Catafractorum Ve-
xillum in Patriæ eduxit hostes, in quos æquè invicta for-
titudo ac Fortuna sua adeo graviter incubuit, ut suæ in-
dignarentur Fortunæ. Loquetur sera Posteritas, marmo-
ribusq; & triumphalibus incidet Cedris tot bello suppa-
res Scipiones, quorum etiamnum sub Signis Martis can-
scit ætas. Tuum hic superstes Domûs invictæ Heros præ-
terire nefas nomen, *Perillusis*, *Magnifice Dñe* POCILLATOR
NURENSIS, qui jam ter senos Marti consecrasti annos,
cui

cui ut suo Agamemnoni Polonus jure inscribat Mars, &
vel inter ipsa accinat classica :

Martius ornat honos Agamemnona, fusa vigorem

Celsaq; membra fovet, vultu præcone potestas,

Enitet, & Martem species armata profatur. (DaresPhryg.)

Idem Vobis, Magna belli Numina, debetur encomium,
ILLUSTRISSIMI CASTELLANI Inowladislaviensis Ger-
mani Fratres, Perillustis Vexillifer Czyscensis, ac alter
Illustrissimi Palatini Plocensis Primipile. Militatis Patriæ,
militatis communi bono, sed & Vobis perennis militat
gloria, militabitq; tamdiu, donec Vos ad eos honorum
Martialibus armis evehat apices, ad quos GRZYBO-
WSCIANÆ Virtuti, jam pervium iter Majorum fecere
exempla. Pergite secundis passibus, quò generosi impel-
lunt spiritus Magnæ Domûs Magna Columna. Tibi ve-
rò, PERILLUSTRIS, MAGNIFICE DOMINE CAPI-
TANEE SULEJOVIENSIS, cùm nondum per ætatem tam
vasta ad gloriæ metam Prædecessorum Tuorum vestigia se-
ctari liceat, tacitis id tamen volvis votis, quod non sine
perenni Nominis Tui fama succedanea evolvant Sæcula,
dummodo victrici Aboriginum Tuorum manu, gladioque
plantata

Laurus annosum Tibi signet ævum,

Fata Te nôrint, propereqtq; Parcæ

Nesciam carpi Tibi destinatos

Stamen in annos. (Sarbiev.)

Quod dum è Patriæ voto, & spe publica, quam de Te
Tuamet in omnium animis excitavit Indoles apprecor, ut-
cumq; sterilem hunc laudum, ast meritorum decorumq;
Domûs Tæ feracissimum, acclinem Nomini Tuo subster-
no Manipulum, ex quo non jam spicas, sed uberrima glo-
riæ GRZYBOWSCIANÆ nutrimenta in alimentum egre-
giæ Indoli collige, & lege.

APO-

APODOSIS PHILOSOPHICA.

Quanquam Heroibus semper maximus debetur honor, certè Sapien-
tibus etiam parem tribuit
Antiquitas. Latè pleriq; per Orbem imperant
fortitudinis adminiculo, gladio pro Sceptris usi, nihilomi-
nùs; *Latiùs imperat*

Qui solus exemptusq; vulgo

Certa sui tenet arma voti.

Ipse Miles, ipse sibi Pugil,

Et ipse Ductor. (Sarbiev. l. 4. Ode 3.)

Imò. *Armata Regem non faciet cohors,*

Non tincta vulgi purpura sanguine.

Rex est, profanos, qui domuit, metus;

Qui cum stat, unus castra sibi facit,

Casumque, fortunamque pulchro

Provocat, assiduus, duello. (Idem ibid.)

Si quæras, quænam sunt illa Sapien-
tiae arma; Assidua Sapi-
entum inspicere bella, quæ inter doctarum jurgia mentium
geruntur. Certè ingenij acies pro gladio est, quâ plures
sternuntur hostes, quàm ferro, quod corpus tantum, non
animos premit. At Philosophicus gladius etiam animis
imperare potest. Quis tamen est ille mentis gladius? ter-
tiam dicam mentis operationem, quam argumentationem
vocamus. Hâc enim solâ macherâ digladiantur ingenia.
Graviter premit ensis, sed gravius argumentum, cujus nul-
lus ictus non fatalis est, si in veritatis hostes inciderit.
Plures profectò in dediti-
onem coguntur ingenij adacti vi,
quàm gladij. Intellectus noster Lanista quidam est, cui
pro manu, quâ fortiter vibret telum, assensus, pro gladio
Syllogismus; hâc dexterâ quidquid apprehenderit, nulla
excutiet vis. Paucas quidem, quia binas tantum in præ-
missis instruit phalanges, quas tamen si clarè in medio vi-
deris, palinodiam illi canes, *vidi, vici*, has enim vidisse
mentis

mentis oculo, vinci est. Imò etsi quam debiliorem cernas, etiam sic victus illius sequeris partes. Felices tamen in hoc Philosophos! quòd nusquam injustum gerant bellum, utpote quod semper pro veritate suscipitur, quam non sine latente interdum formidine. Nec fidei quoq; causa ab hoc excluditur bello, nisi ab illis geratur, qui præ metu negant se quidquam scire, aut si quid se scire dicant, fidem perdunt. Syllogistico itaq; gladio totum sibi Philosophi Stagyriticum subjugant Orbem, utpote quorum totus mundus disputationi traditus. Disputatio quasi deputatio quædam, à putando nomen derivat, quòd ut gladio, ita argumentatione non paucis erroribus amputata capita in trophæum cessere Sapientibus. Alexandri Magni Ensi inscripsit quispiam: *Sit solvere nodos*, (Apell. Symb.) melius id Aristotelico inscripsisset gladio. Pro Coronide itaque Discursus eidem & ego sequentes incido

INSCRIPTIONES.

- I. **S**yllogismus est Oratio constans tribus Propositionibus, ex quarum duabus, certo modo dispositis, tertia sequitur, propter connexionem terminorum cum medio. Fundatur in hoc principio: quæ sunt eadem uni tertio, sunt eadem inter se:
- II. Præmissæ formales non concurrunt efficienter ad assensum Conclusionis.
- III. Bene dispositæ, & intellectæ, necessitant intellectum, tam quò ad speciem, quam quò ad exercitium ponendæ Conclusionis.

IV. De-

IV. Demonstratio est Syllogismus, in quo ex certis & evidentibus præmissis, sequitur certa & evidens Conclusio.

V. Potest simul stare in intellectu de eodem objecto Scientia, Fides, & Opinio; Imò idem actus potest esse simul Scientiæ, Fidei, & Opinionis.

*Ad M. D. T. O. M. G. B. V. M. S. L. O. G.
Honorem.*



Manuscript of the ...
...
...
...
...
...
...
...
...
...

M. A. D. T. O. N. G. B. N. M. S. L. O. C.
...





620859 Bibliotheca 10000-
P.P. Camaldulensium in Bielany

Depozyt w Bibliotece Jagiellońskiej



00417

